

ROHE-AHU BUKANA

1

¹ Hanua badana madi ihabaina!
 Gunaguna taunimanima ai e honu honu dae;
 harihari ia na gabu degedegena rahu.
 Gunaguna ia na bada, bese idau-idau bogaragidiai;
 harihari ia na vabu hegereggerena ai vada ela.
 Gunaguna ia na pavapava natuna hahinena
 hanua idau-idau bogaragidiai;
 harihari ia na hesiai hahinena ai vada ela.

² Hanuaboi ai e tai dikadikamu,
 irurumatana na vahana ai mimia;
 e ura heniamu taudia iboudiai bogaragidia amo
 ta ese tauna se haloamu;
 ia turana iboudiai ese vada e koia,
 inaina ai vada e hahelao.

³ Iuda na dauhai vada e hanohoa,
 e hisihisimu bona hesiai ġaukaradia aukadia e
 karamu;
 bese idau-idau bogaragidiai e nohomu,
 a ena laġa-ani gabuna ta se davariamu;
 e hahavaia taudia iboudiai ese vada e lasia tao,
 ena lalo-hisihisi negana ai.

⁴ Siona e lao heniamu daladia na mai hebogahi-sidia,
 badina be aria e gwauraimu negadia ai na ta
 se maimu;
 ena ikoukou iboudiai vada e vahu,

ena helaḡa taudia e ganagānamu;
 ena ulato vada e dabuidia oho,
 ia na e hisihisi dikadikamu.

⁵ Ia inaina na ikwarana ai vada ela,
 ana inai taudia edia namo e bada e laomu;
 badina be Iehova ese vada e hahisia,
 ena kara kerere momo herea daidiae;
 ia natuna na dauha vada ela,
 inai taudia vairadiai vada e ġuidia.

⁶ Siona kekenina na hairaina idoinai ese
 vada e rakatania;
 ena lohia na dia mamaruanedia na heheto,
 rei gabudia asie davarimu;
 e hahavadia taudia vairadiai e heau,
 to asi goadadia.

⁷ Ierusalem na e helalo unemu,
 ena hisihisi bona ena lalo-idita lalodiae;
 ena ġau herea-daedia iboudiae nega gunadia ai e
 abiva
 na e lalolaidia unemu.
 Ena taunimanima na inaidia imadia ai e heato
 bona asi ikahana ta negana ai,
 inai tauna ese e ġonaġonalia,
 ena keto e kirikirilaia.

⁸ Ierusalem na e kara dika badava,
 una dainai vada e miro dikadika;
 e imodaiaava taudia ese e dadaraiaamu,
 badina be ġaġaena ai vada e itaia;
 oibe, ia sibona e ġanaganamu,
 e roha daudaumu.

⁹ Mirona na ramina ai,

baine dika na se laloa;
 una dainai ena keto na bada herea,
 asi tauna ihalona tauna ta.
 Iehova e, egu hisihisi a itaia,
 badina be inai tauna vada e kwalimu.

10 Inai tauna ese vada e toi roro,
 ena āgau herea-daedia iboudiai daedai;
 oibe, ia ese bese idau-idau vada e itadia,
 ena gabu helāgana ai vada e raka vareai;
 unu na oi ese o gwaudia tao taudia,
 emu bese edia hebou lalonai basie vareai oto.

11 Ena taunimanima iboudiai ese adia e tahuamu,
 mai āganāgānadia ida;
 edia kohu herea-daedia amo adia e hoimu,
 edia goada ihamatamatana totona.
 Iehova e, a gaga isi, a itaia,
 badina be vada e dadaraigumu.

12 O raka hanaimu taumui iboumui ai, ina na asio
 laloamu a?
 A gaga isi, a itaia,
 hisihisi ta na mia lauegu hisihisi heğereğeren
 eiava,
 lau latagu ai vada e kau hisina,
 Iehova ese ena badu āgarāgara dinana ai
 e hahisilaigu āgauna.

13 Atai amo ia ese lahi e siaia dobi,
 lau turiagu lalodiai e hadihoa;
 huo e otoa, lau aegu iabidia,
 ia ese e halougu;
 mase-reagu ai e rakatanigu,
 taugu na e manorimu dina idoinai.

- 14** Egu kara kerere na maduna auna ai e halaoa,
 ia imana ese e gui bou;
 aiogu ai e ato kau,
 ia ese egu goada na e hamanokaia;
 lau ese asina laodia ahu diba taudia imadia ai
 Gaubada ese vada e atogu.
- 15** Ģaubada ese egu goada-herea taudia iboudiai na
 bogaragigu ai e dadaraidia;
 hegogo ta e gwauraia, lau ihadikagu,
 egu eregabe taudia imoi-taodia;
 Iuda ena rami-hebou ulatona na Ģaubada ese vada
 e moia tao,
 vine imoilaina gabuna ai bema moimoilaia
 na heto.
- 16** Ini ġau daidiae na taitaimu,
 iruru-matagu na e dihomu;
 badina be tauhalo tauna na dauhai,
 egu haheauka ihamamatatana tauna na
 dauhai;
 natugu na vada e baia,
 badina be inai tauna na vada e kwalimu.
- 17** Siona ese imana e toi roromu,
 a asi tauna ta ese ia tauna e haloamu;
 Iehova ese ena haheġani na Iakob latanai vada e
 gwauraia,
 ia dekena taudia na inaina ai baela eto;
 Ierusalem na ġau miro-hereana ai vada ela
 idia bogaragidiai.
- 18** Iehova na maoromaoro,
 badina be vada na gwau edeede henia;

a umui bese idau-idau taumui iboumui ai, a kamonai,
 bona egu hisihisi ba itaia;
 egu ulato bona egu uhau na
 mai īguidia ida vada e laohaidia.

¹⁹ E ura henigu taudia na boiridia,
 a idia ese e koigu;
 egu hahelaāga taudia bona egu tau-badadia
 na hanua ai e mase ore,
 edia goada ihamatamatana anianina
 e tahuava negana ai.

²⁰ Iehova e, a itaia, badina be na hisihisimu,
 laumagu na e dauremu;
 lalogu na e gugubaiamu,
 badina be vada na gwau edeede dikadika;
 ariara ai dare na e ala-alamu,
 rumu na variha rumana na heto.

²¹ Egu īganaāgana a kamonai,
 asi taugu ihalona tauna ta;
 inaigu iboudiai ese egu hekwakwanai sivaraina
 vada e kamonai,
 idia na e moalemu, oi ese vada o karaia
 dainai;
 vada o gwauraia dinana a halasia,
 idia na lau heğereğeregu ai baela.

²² Edia kara dika idoinai na oi vairamu ai baine
 hedinarai,
 bena ba kara henidia,
 lauegu kara kereredia iboudiai daidiae
 vada o kara henigu heğereğerena;

badina be na ġanaġana momomu,
bona lalogu na e manoka:manokamu.

2

¹ Ĝaubada ese ena badu ai
Siona kekenina na dagadaga henuai vada e
atoa;
Israel hairaina na guba amo
vada e tahoa dobi tanobada ai;
ena badu dinana ai na
ia aena ihadaidia ġauna se laloa tao.

² Ĝaubada ese Iakob ena noho gabudia iboudiai
vada e habuadia tari, se bogadia hisi;
Iuda kekenina ena gabu aukadia na
ena badu ai vada e gigidia dobi;
basileia mai ikwarana taudia ida
vada e haketodia tano ai, mai hemaradia ida.

³ Israel ena goada idoinai na
ena badu ġaraġarana ai vada e utua dobi;
ia imana idibana na edia amo e abia oho,
inai taudia vairadiae;
Iakob enai vada e ara, lahi hururu-hururuna na
heto,
heġegemadai ġaudia iboudiai vada e aradia ore.

⁴ Ena peva vada e marea, inai tauna na heto;
imana vada e ha-aukaia, tuari tauna na heto;
ta matarealaimu taudia na ia ese vada e aladia
mase,
Siona kekenina ena kalaga ai;
ena badu ġaraġara vada e bubua dobi,
lahi na heto.

5 Ġaubada na inai tauna heğereğerenā ai vada ela,
 ia ese Israel vada e habuaia tari;
 ena lohia rumadia iboudiai ia ese vada e habuadia
 tari,
 ena gabu aukadia vada e ġigidia dobi;
 Iuda kekenina ena taitai bona ena rohe-ahu
 ia ese vada e habada.

6 Ia ese ena kalaga vada e rohoa, uma kalagana na
 heto,
 e gwaurai ariadia gabuna vada e ġigia dobi;
 e gwauraia ariana bona dina helaġana
 Iehova ese vada e hadokodia Siona ai;
 bona ena badu garagarana ai
 pavapava bona hahelaġa tauna vada e
 dadaraidia.

7 Ġaubada ese ena ihaboulaina patana vada e
 uduguiraira,
 bona ena gabu helaġana vada e dadaraia;
 ena lohia rumadia maġudia na
 inai tauna imana ai vada e atodia;
 Iehova ena dubu ai heloġo-heloġo e vara,
 e gwauraia ariana dinana ai na heto.

8 Iehova ese lalona vada e ha-aukaia,
 Siona kekenina ena magu baine ġigia dobi;
 hahetoho varona amo vada e hahetoho,
 imana na ihabua-tarina amo se veria dua;
 kohoro bona maġu vada e hahisidia,
 idia na e manoka heboumu.

9 Ena ikoukou na tano ai vada e hepuni,
 ena auri vada e hadikadia, vada e hakwaidu-
 dia;

ena pavapava bona-ena lohia na bese idau-idau
 bogaragidiai,
 taravatu na vada e ore,
 bona ena peroveta taudia ese mata-hanai ta se
 abiamu,
 Iehova ena amo.

¹⁰ Siona ena tau-badadia na
 tano ai e helaimu, asi reğereğedia;
 kahu na tubuadia ai vada e ġiġi kau,
 bona puse dabuadia vada e hahedokilai;
 Ierusalem ulatodia ese
 tano vada e igo henia.

¹¹ Matagu na taitai ai vada e malaka-malaka,
 laumagu na e dauremu;
 Ialogu na hisihisi ese e gugubaiamu,
 egu bese ihabua-tarina dainai;
 badina be natudia karukarudia bona memero-
 memero na
 hanua ariarana lalodai e manoridiamu.

¹² Idia ese sinadia e tai henidiamu, e tomu
 “Aniani bona vine ranuna na edesenai ai?”
 Vada e bero taudia heğereğeredia ai e mase reamu,
 hanua ariarana lalodai;
 sinadia kemedia ai
 edia mauri e oremu.

¹³ Ierusalem kekenimu e,
 ede baina gwauraimu toma bona dahaka ida
 baina haheğereğeremu?
 Siona rami-hebou ulatona e,
 dahaka ida baina haheğereğeremu, oi taumu
 ihalona totona?

Badina be ihabua-tarimu na bada herea, davara
na heto;
daika ese baine hamaurimu lou?

14 Emu peroveta taudia ese oi daimu ai
mata-hanai koikoidia bona kavakavadia
vada e itadia;
emu kara havara asie gwaurai hedinarai,
ihanamo-loumu totona,
a daimu ai peroveta herevadia koikoidia vada e
itadia,
unu amo vada e hakaumu kerere.

15 Dala ai e raka hanaimu taudia iboudiai ese
imadia na e patapata henimumu;
e si dagumu, kwaradia na Ierusalem kekenina
e ladolado heniamu, e tomu,
E gwauraia “hairai herea-daena” bona “tanobada
idoinali ihamoalena”
hanuana binai a?

16 Oi inaimu iboudiai ese
e ihi-ihiraimumu;
e si dagumu, gadigadidia e hahedaimu,
e lolomu, e tomu: Vada ta habuaia tari;
ta uralaia lalo-dikava dinana binai,
harihari vada ta davaria, vada ta itaia.

17 Iehova ese e laloa hata karana vada e karaia,
e gwau guna, bena vada e hamomokania;
idau nega ai e gwauraia heğereğerena ai
vada e hahegigia dobi, asi ena hebogahisi;
inai tauna vada e hamoalea oi latamu ai,
amu inai taudia edia siahu vada e habadaia.

18 Siona kekenimu e

Āgaubada ba tai lolo henia!
 Iruru-mata na bae aru abata na heto,
 dina ai bona hanuaboi ai;
 laāgamu basio ania,
 matamu danu basie laāga ani.

¹⁹ A tore isi, hanuaboi ai ba tai lolo,
 hegima negadia ta ta imatamadia ai;
 lalomu anina ba bubua nege ranu na heto,
 Āgaubada vairanai;
 imamu na ba dudui dae henia,
 natumu edia mauri daidiae;
 badina be idia na hitolo dainai e mase reamu,
 ariara iboudiae dokodia ai.

²⁰ Iehova e, a hageremai, a itaia,
 daidiae na unu vada o kara henidia toma?
 Hahine ese natudiae bae anidia,
 e dosidiae memerodia bae anidia, a?
 Hahelaāga tauna bona peroveta tauna na
 Āgaubada ena gabu helāgana ai bae aladia mase
 a?

²¹ Ariara āghudiae ai
 memero bona iahu e hekida boumu;
 egu ulato bona egu uhau
 na dare ai vada e mase;
 emu badu dinana ai vada o aladia,
 vada o aladia mase, so bogadia hisi.

²² E hagarigumu āgaudiae na kaha iboudiae amo o
 boiridia,
 e gwauraia ariana dinana ai na heto;
 Iehova ena badu dinana ai
 ta se heau, ta se mauri;

na hadorodia bona na ubudia memerodia na
agu inai tauna ese vada e habuadia tari.

3

- ¹ Ena badu hekwadi-auna hisihisina lalonai,
hisi vada na ani;
- ² dibura ai vada e lulugu vareai,
asi diarina gabuna ai;
- ³ momokani, ia imana na lau ihadikagu totona
vada e abia isi loulou, dina idoinai.
- ⁴ Hidiogu bona kopigu vada e ha-oredia,
bona turiagu vada e hakwaidudia;
- ⁵ vada e kougu ahu, vada e govagu ahu,
lalo-idita ai bona lalo-hisihisi ai;
- ⁶ dibura ai vada e hanohogu,
idau nega ai e mase taudia na heheto.
- ⁷ Vada e magugu heğeğe, asi egu roho-mauri
dalana,
auri metaudia ai vada e ġuigu;
- ⁸ na boiboomu, na tai lolomu, ta ese baine kahagu
totona,
a ia ese egu ġuriġuri e laoa ahumu;
- ⁹ e utu nadidia amo egu dala vada e koudia,
egu raka daladia vada e hagagevadia.
- ¹⁰ Egu ai ia na e banimu beana na heto,
e komumu, leona na heto;
- ¹¹ egu dala amo e hakaugu siri, e daregu patapata,
vada e habaiagu;
- ¹² ena peva e marea,
baine tarakia ġauna ai e halaogu.

- ¹³ Ena diba pauana dibadia amo,
nadinadigu na e tarakidia;
- ¹⁴ bese iboudiai ese e kirikirilaigumu,
edia ane ai e hevasehalaigumu dina idoinai;
- ¹⁵ lalogu na vada e ha-iditaia ġuguru,
ava iditana amo vada e hahonugu.
- ¹⁶ Isegu na nadinadi e hagaualaidia,
kahu ai vada e hagorugu diho;
- ¹⁷ laumagu na maino ai e dabumu,
moale vada na reaia;
- ¹⁸ taunabunai lau na tomamu: Hairaigu vada e
boio
bona egu helaro Iehova ena amo danu.
- ¹⁹ Egu hisihisi bona egu lalo-idita ba ialo tao,
ava iditana bona muramura iditana danu;
- ²⁰ laumagu ese e haeroa louloumu,
bona lalogu ai e igo dihomu;
- ²¹ a ina na na laloa unemu,
taunabunai na helaromu.
- ²² Iehova ena mia-hanaihanai lalokauna na se
oremu
ena hebogahisi karadia na asie dokomu;
- ²³ daba iboudiai idia na mamamatama;
emu heabidadama na bada herea.
- ²⁴ Laumagu na e tomu: Iehova na lau ahugu;
una dainai ia baina laroa.
- ²⁵ E nariamu taudia na Iehova ese e hanamodi-
amu,
bona e tahuamu taudia danu.
- ²⁶ Iehova ena hahemauri baita naria, asi
reğereğeda,

- una na namo;
- ²⁷ tau ta ese eregabena ai maduna baine huaia,
una danu namo.
- ²⁸ Maduna na pagana ai vada e atoa negana ai,
ia na sibona baine helai, asi reğereğena;
- ²⁹ uduna na ġahu ai baine atoa,
reana helaro do baine vara;
- ³⁰ vahana na hebota tauna baine mede henia,
ġonāġona herevadia ai baine honu.
- ³¹ Badina be Ĝaubada ese basine negea daure
ela bona hanaihanai;
- ³² ena be lalona baine hahisia, to baine bogaia hisi,
ena hebogahisi bada-hereana heğereğeren;
- ³³ badina be taunimanima natudia tau-anidia
eiava lalodia
ihahisihisidia na se uramu.
- ³⁴ E ġuidia taudia iboudiai tanobada ai
bae moidia tao,
- ³⁵ eiava tau ta igwaurai-maorona bae laoa ahu
Dirava Herea-Mikamika vairanai,
- ³⁶ eiava tau ta ena gini-kau dalana bae ha-
gagevaia;
una kara na Ĝaubada ese se abi daemu.
- ³⁷ Daika na e haheğani bena anina e vara,
Ĝaubada na se gwau maoro negana ai?
- ³⁸ Dirava Herea-Mikamika uduna amo
namo bona dika na e maimu ani?
- ³⁹ Mauri tauna baine maumau badina be dahaka?
Ena dika davana iabina baine maumauraia
anina be dahaka?

- 40 Eda dala baita tohodia bona baita tahudia,
 bena Iehova baita lou henia;
- 41 laloda bona imada baita abidia isi,
 guba ai e nohomu Diravana enai, baitato,
- 42 Ai na vada a kerere bona vada a gwau edeede,
 bena oi ese emai dika so gwau tao.
- 43 Badu vada o riao, vada o hahavamai,
 vada o alamai mase, so bogamai hisi;
- 44 ori vada o riao,
 ḡuriḡuri ta basine hanai helaooreana.
- 45 Oi ese kopikopi bona momoru ai vada o halao-
 mai,
 bese idau-idau bogaragidiai.
- 46 Ai inaimai iboudiai ese
 e ḡonaḡonalaimaimu;
- 47 gari bada bona hekwakwanai na latamai ai
 vada e kau,
 hahevahu bona hahebua-tari danu;
- 48 iruru-matagu na e arumu sinavai na heto,
 egu bese kekenina ena mase dainai.
- 49 Iruru-matagu bae diho asi dokona,
 bona asi komadana,
- 50 ela bona Iehova na guba amo baine roha dobi,
 bena baine itagu;
- 51 matagu ese e hahisihisigu,
 egu hanua ulatodia iboudiai vada e dika
 dainai.
- 52 Asi badina e inai henigu taudia ese e tahugu,
 labana tauna ese manu e tahuamu na heto;
- 53 maurigu ai guri lalonai e tahogu dobi,

- bona nadi na latagu ai e taho kau;
- ⁵⁴ ranu ai na mutu, nato
“Vada name boio”.
- ⁵⁵ Iehova e, oi ladamu na hahanea,
guri dobudobu amo;
- ⁵⁶ egu noinoi, nato “Hekaha na noiamu, taiamu na
egu ai basio koua ahu” na
oi ese vada o kamonai;
- ⁵⁷ na boi henimu negana ai o raka kahira,
oto “Basio gari”.
- ⁵⁸ Čaubada e, oi ese egu ginikau gabuna vada o
lailaia,
oi ese egu mauri vada o rauaia.
- ⁵⁹ Iehova e, oi ese vada o itaia, e kara dika henigu;
ba hahemaoro henigu.
- ⁶⁰ Oi ese edia dava-heni idoinai vada o itaia,
lau ihadikagu karadia e lalo-hadailaimu
ğaudia iboudiai.
- ⁶¹ Iehova e, edia heğonağonalai herevadia vada o
kamonai,
lau ihadikagu karadia e lalo-hadailaimu
ğaudia iboudiai;
- ⁶² e ala-ala henigumu taudia ududia bona edia
lalo-hadai ese
lau e hadikalaigumu dina idoinai.
- ⁶³ Edia helai diho bona edia tore isi a itaia;
edia ane ai e hevasehalaigu.
- ⁶⁴ Iehova e, oi ese davadia ba henidia,
idia imadia ğaukaradia heğereğeredia;
- ⁶⁵ oi ese lalodia ba haduhudia,

emu heuduguirai na latadiai baine kau.

66 Iehova e, oi ese badu ai ba hahavadia,
emu guba henuna amo ba habuadia tari.

4

1 *Gold* vada e hoḡohoḡo,
gold ġoeva-daena vada e idau;
nadi helagadia vada eme heḡīḡī rohoroho,
ariara iboudiai dokodia ai.

2 Siona natuna mamaruanedia herea-daedia,
davildia na *gold* ġoevaḡoevana metaudia
heḡereḡeredia ai,
madi, ihabaidia, raro urodia ida vada e ha-
heḡereḡeredia,
uro ikarana tauna imana ese e kara ġaudia na
heheto.

3 Uda sisiadia ese natudia e ubudi unu,
rata na e henidiamu;
a egū bese natuna hahinena vada e daḡedāḡe,
uda kokokokodia na heheto.

4 Rata e topoamu merona malana na
ranu mase dainai uduna atai maona ai e kape
daemu;
memero na aniani dainai e noinoimu,
a ta ese adia se henidiamu.

5 Aniani manoka-manokadia e aniva taudia na
ariara ai e masemu;
dabua kakakakadia idokilaidia e manadava tau-
dia na
kahu e negeamu gabudia ai e hekuremu.

- 6** Badina be egu bese natuna hahinena ena kara
dika davana ese
Sodoma ena kara dika davana vada e hereaia;
una hanua na e heğigi dobi haraga-haraga,
tau ta ese se daua toho negana ai.
- 7** Ena lohia taudia na ġoġoeva-ġoġoeva, *snow* ena
ġoġoeva-ġoġoeva e hereaiamu;
idia na kukuroka-kukuroka, rata ena
kurokuro e hereaiamu;
tau-anidia na kakakaka, ġiriġi ena kakakaka e
hereaiamu;
oromadia na mai hairaidia, sapairo nadidia
na heheto.
- 8** Harihari idia vairadia na korema-korema, guma
ena korema e hereaiamu;
ariara ai bae itadia taudia basie diba idia na
daidia;
kopidia na e makuku turiadia ai,
vada e kakoro au na heto.
- 9** Dare ai e mase taudia edia moale ese
hitolo ai e mase taudia edia moale e hereaia;
idia na e varoda-varodava,
uma na asi anidia dainai e maseva.
- 10** Hebogahisi hahinedia imadia ese
natudia adoradia vada e nadudia;
adia vamu ai vada e halaodia,
egu bese natuna hahinena ihabua-tarina ai.
- 11** Iehova ese ena badu e hasiahua,
ena badu fiarağarana e bubua dobi;
Siona ai lahi e ha-araia,

hanua badidia e aradia ore.

¹² Tanobada pavapavadia ese asie abia dae,
 tanobada taudia iboudiai ese danu,
 tuari tauna ta eiava inai tauna ta ese
 Ierusalem ikoukoudia lalodiae baine raka
 vareai diba.

¹³ Ina na ena peroveta taudia edia kara dik
 bona ena hahelaāga taudia edia kara havara
 daidiae,
 idia ese kara maoromaoro taudia raradia e hahe-
 bubu
 ia bogaraginai.

¹⁴ Idia na mata-kepuludia ai ariara ai e loava,
 rara ese vada e hamirodia,
 bona tau ta ese
 edia dabua na basine dau toho diba.

¹⁵ Taunimanima ese e boi henidia, eto,
 A siri! Mai miromui!
 A siri! A siri! Basio hedau toho!
 Bena idia na heau bona loa-evaeva taudia ai ela;
 bese idau-idau bogaragidiai taunimanima
 eto:
 Ai dekemai ai basie noho lou.

¹⁶ Iehova sibona ese e hakarohodia rohoroho,
 ia ese basine haāgeredia lou;
 hahelaāga taudia na asie matauraidia,
 bona hanua tau-badadia na asie lalo namo
 henidia.

¹⁷ Matamai e valahu-valahu, hekaha inarina ai,
 a gima kava hanaihanaiva dainai;
 emai hegima lalonai

hahemauri asi dibana besena a nariava.

¹⁸ Taunimanima na ae-gedumai ai e raka dainai
 emai ariara ai asia raka diba;
dokomai vada e kahikahi, emai mauri dinadia
 vada e duahi,
badina be dokomai vada e kau.

¹⁹ E hahavamai taudia edia heau ese
 guba ugavadia edia roho e hereaia;
ororo ai e hahavamai,
 tano ġaġaena ai e bani henimai.

²⁰ Iehova ese e horoa tauna, emai mauri laġana, na
 edia guri ai e abia;
a ai ese vada a herevalaia, ato,
 Bese idau-idau bogaragidiae ia ikerukeruna ai
 baia noho.

²¹ Edom kekenimu e, Usu tanona ai o nohomu,
 ba moale, ba hisi dae!
A oiemu ai danu kehere baine kau,
 ba kekero, emu dabua ba doki oho, ġaġaemu ai
 ba noho.

²² Siona kekenimu e, emu kara havara davana
 vada o abia ġuġuru,
 ma dauhai basine hanohomu;
a Edom kekenimu e, emu kara havara davana
 baine henimu,
 emu kara dika baine hulalai.

5

¹ Iehova e, emai ai vada e vara ġaudia ba lalo tao;
a haġeremai, e hahemaraimaimu ġaudia ba itadia.

² Emai tano na idau taudia vada e henidia;

emai ruma na idau bese taudia vada e henidia.

- 3 Ai na vada a ihareha, asi tamamai;
sinamai na vabu heğereğeredia.
- 4 Emai inuinu ranuna na a hoimu;
au a abimu na mai davadia.
- 5 Pağamai mai madunadia ai a hekwarahimu;
taumai e boeramu, Isie halaga-anaimaimu.
- 6 Imamai na Aigupto bona Asuria vada e toi roro
henidia,
amai na baine davana totona.
- 7 Tamamai e kara dikä, bena vada e mase;
benä ai ese edia kara havara a huamu.
- 8 Hesiai tauna ese e lohiamaimu,
asi tauna ta ese idia imadia amo e hamauri-
maimu.
- 9 Amai a tahumu mai garimai ida,
tano ġaġena ai dare ese baine alamai mase na
garina.
- 10 Kopimai e siahumu, amu siahuna na heto,
doe heğaragħarana dainai.
- 11 Siona ai hahine na e dadidiamu,
bona rami-hebou ulatodia Iuda ai.
- 12 Hanua lohiadia na imadia amo e taudia daemu,
hanua tau-badadia na asie matauraidiamu.
- 13 Eregabe taudia na e haġaukaradiam, flaoa iriri-
laina gabuna ai;
memero na e raragamu, au metaudia e huadi-
amu dainai.
- 14 Iahu ese hanua ikoukouna vada e rakatania;
eregabe taudia ese edia hatai-hatai ġaudia na
vada e atodia diho.
- 15 Moale vada e doko lalomai ai,
bona emai mavaru na taitai ai vada e hahelao.
- 16 Havava ġauna na kwaramai amo vada e moru;

- madi ihabaimai, vada a kara dika dainai.
- 17 Ina dainai Ialomai vada e manoka-manoka,
ini īgau daidiae matamai vada e valahu-
valahu.
- 18 Siona ororona vada e vahu dainai;
uda sisiadia na ia latanai e loamu.
- 19 A oi, Iehova e, o lohia hanaihanaimu;
emu terono na e miamu, uru iboudiai lalo-
diae.
- 20 Badina be dahaka o lalomai boio
hanaihanaimu;
Dahaka dainai nega daudau vada o rakatani-
mai?
- 21 Iehova e, bavabimai dae lou, bena baia namo
lou;
emai dina ba hamatamatadia, nega gunadia
heğereğeredia.
- 22 Eiava, vada o dadaraimai vaitani a?
Vada o badu henimai vaitani a?

**Buk Baibel long tokples Motu
The Holy Bible in the Motu language of Papua New
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca